





47931/A

E. VII

王明

92.

Gesetzl. Bibliothek

SEYFFERT

20

Versteht sich, dass die

1870

*Deinde ad ecclesiam*




IGNIVOMUS  
MICROCOSMI  
VESUVIUS  
EUNDEM  
VORACI FLAMMA  
DEPASCENS.

SEU

THESES  
MEDICÆ

DE

INFLAMATIONIBUS  
IN  
GENERE, & IN SPECIE.



VETERO-PRAGÆ, Typis Caroli Jo-  
sephi Gerzabek, Anno 1719.



Quas

SUB GLORIOSISSIMIS AUSPICIIS  
SACRATISSIMI, AUGUSTISSIMI,  
& INVICTISSIMI

ROMANORUM  
IMPERATORIS  
CAROLI  
SEXTI.

GERMANIÆ, HISPANIARUM,  
INDIARUM, HUNGARIÆ, BOHEMIÆ,  
DALMATIÆ, CROATIAE, SCLAVONIAE,

&c. &c.

REGIS  
POTENTISSIMI.



SUB RECTORATU:

*PRÆNOBILIS, GENEROSI, CLARISSIMI VIRI*

D. JOANNIS ADAMI  
BESNECKER.

J. U. Doctoris, Sacræ Cæsareæ, Regiæque Majestatis Consiliarij, in præfata Universitate Carolo-Ferdinandea Pragensi SS. Canonum Professoris Regij, Publici, ac Ordinarij, Inclytæ Facultatis Juridicæ Senioris, nec non Venerabilis Archi-Episcopalis Consistorij Pragensis Assessoris, ac p. t.

RECTORIS MAGNIFICI.

SUB DECANATU:

*PERILLUSTRIS, GENEROSI, CLARISSIMI, & EXCELLENTISSIMI VIRI*

D. JOANNIS FRANCISCI  
LöW,

S. R. Imperij, & Provinciarum Hæreditariarum Equitis ab ERLSFELDT, Domini in Logovvitz, & Modletitz, Philosoph. J. U. & Medicinæ Doctoris, Sac. Cæs. Regiæque Majestatis Consiliarij, in Alma, & Antiquissima Universitate Carolo-Ferdinandea Pragensi ejusdem Medicinæ Professoris Primarij, Regij, Publici, ac Ordinarij, Academ. Cæsar. Leopold. Carol. Natur. Curios. Coll. Aeron. di& Sac. Lateran. Palatij, Aulæque Cæsareæ Comitissæ, ac Medici, Inclytæ Facultatis Medicæ Senioris, & p. t.

SPECTABILIS DECANI



SUB PRÆSIDIO :

PRÆNOBILIS , GENEROSI , DOCTISSIMI ,  
*ac EXCELLENTISSIMI VIRI*

D. FRANCISCI GABRIELIS  
KRUSIJ de KRAUSENBERG.

Philosoph. & Medicinæ Doctoris , In Universita-  
te Carolo-Ferdinandea Pragensi Praxeos Professoris  
Regij , Publici , ac Ordinarij.

ANNUENTE :

NOBILISSIMO , ac AMPLISSIMO  
EXCELLENTISSIMÆ FACUL-  
TATIS MEDICÆ COL-  
LEGIO.

*Pro Suprema Doctoratûs Medici Laurea pu-  
blica ventilationi exposuit*

FRANCISCUS MAXIMILIANUS  
SEYFFERT

Passaviensis , AA. LL. & Philosophiæ  
Magister , Medicinæ Candidatus.

*Annô M. DCC. XIX. Mense Augusto, Die 25.  
Horis post Meridiem consuetis.*

HO-



# HONORI ET VENERATIONI

*PRÆNOBILIUM, STRENUORUM, ac*  
*CONSULTISSIMORUM*  
URBIS PASSAVIENSIS  
DOMINI CONSULIS,  
JUDICIS, ac MAGISTRATUS  
INCLYTI

*DOMINORUM, ac PATRONORUM MEO-*  
*RUM GRATIOSISSIMORUM.*



ESTRA vobis defe-  
ro. Flores sisto,  
eosque non ex hor-  
to alieno, sed vel  
hinc VESTRO,  
quia meo. Adeò  
nempe, quid quid sum, totus totus  
VESTER sum: Ipso nascendi jure, &  
de-



derivatis in me beneficijs copiosissimis is esse occœpi. Flores isti non solum colorum varietate, aut foliorum elegantiâ illudunt oculis, vi, & virtute quoque pollent suâ. Nomina inquiritis? Florentissimi Aphorismi Medici sunt, probatissima Empiricorum, ac Dogmaticorum principia, saluberrimæ de dignoscendis INFLAMMATIONIBUS in GENERE, æquè ac SPECIE doctrinæ. Non minus impigro labore, quàm successu apprimè fortunato implantavi eos areolæ mentis meæ. Ubi firmas hîc egêre radices, assurrexerunt in scapum, progerminârunt in pericarpium, ac disruptô tandem calice, publico in tentamine publicæ lucis facti sunt, primas inter curas reposui, ex condigna eorum oblatione suum ijs nundinari pretium, ac conservationem.

Et



Et ubi amabò, aut decentius, aut  
certius nanciscar hæc, quam si VES-  
TRA ijs DOMINI DOMINI, ac PATRO-  
NI MEI GRATIOSISSIMI præfigam NO-  
MINA, quibus tot ego nominibus sum  
obstrictus. Pluribus annis largissi-  
mè indulto stipendio in studijs fovi-  
stis me, gratiarum VESTRARUM  
amplissimo aquæductu tanta jam  
per intervalla temporū eorum pro-  
gressum fortunâstis. Ità profectò  
me illibata amet, ac depereat veritas,  
ac si saluberrimæ Facultati Medicæ  
Tri-Urbis Czechicæ inscribere de his  
floribus debeo, HÆC PLANTAVIT,  
SPECTATISSIMO MAGISTRA-  
TUI TRI-URBIS VESTRÆ PA-  
TAVIÆ in acceptis referre necesse  
habeam, quia HÆC RIGAVIT proficua  
hæc mentis minimè effœtæ germina,  
quibus suū Deus dedit, & daturus est  
incre-



incrementum. Tres inter fluvios  
positi eorum induere videmini, &  
naturam : Undas suas largè expof-  
centibus indulgent. Haufi certè e-  
go hinc beneficia quàm plurima :  
Flores hi mei ab uno ifto latice sunt  
recreati. Decet profectò hinc pluri-  
mum, ut tritæ affurgam, parcœmiæ  
AQUAM HAUSISTI , FONTEM CORONA.  
Egi illud hætenus VESTRIS ex gra-  
tiji : ago iftud nunc, at meo ex mu-  
nere Aphorifmif his meis, ceu flori-  
bus verè coronarijs VOBIS quàm  
fubmiffiffimè oblatif. Me, & vitam  
meam fimul , at nunquam fatif de-  
meritura obfequia, VESTRIS impe-  
rijs dico, ac confecro.


PRENOBILIUM, STRENUA-  
RUM, ac CONSULTISSIMARUM DO-  
MINATIONUM VESTRARUM.

Devotiffimus Servus  
FRANCISCUS MAXIMILIANUS SEYFFERTS





# PROOEMIUM.

I magna illa mundi aspectabilis Universitas magnum aliquod animal dici non potest, contra Platonem, ex eo, quod sic vulgò dictus spiritus mundi, aut veriùs, quòd anima mundi Platonica, quam mentem ratione præditam statuiffe inculpatur, admitti nullatenus possit; saltèm versâ vice, *homo* in corporis sui fabrica mechanica, & nudo organismo consideratus *parvus* semper *mundus*, atque ità, quòd & usus passim inter Philosophos obtinuit, *homo* adhuc *Microcosmus*, non *Macrocosmus* tamen homo, utpotè non animâ nec ratione præditus, nec quidem animal, si spiritu & sensu caret, appellari poterit. Curiosum sanè, enactumque compendium, & ectypon *Universi Homo*! sique verbis Platonis uti



licet, inverſis tamen : *Homo* , *parvus ille mundus* , *offa habet locò lapidum* , *venas locò rivorum* , *pilos locò arborum* , *inter cujus etiam capillos nutriuntur vermiculi* , *ut inter pilos arborum* , & *fruticum animalia* : Nec pluribus hodie conformitatem Micro-cosmi ad Macro-cosmum expendere lubet , difficilius verò ex eo dabis quidpiam, quod in isto ſui non habeat analogum.

Si tibi Macro-cosmus indeficiente videtur ſuperbire luce ſolis & aſtrorum ; infinitis animæ luminibus adſtat Micro-cosmus ; nam intellectu & ſpiritibus imitatur ſolem, motus cœli, cœlorumque intelligentias ; calore nativo gubernat omnia, & vegetat. Si hic Megacosmus fluminum pollet venuſtate ; Micro-cosmus humorum excellit utilitate : habes in pulſu & circulatione ſanguinis fluxum & refluxum aquarum , in reſpiratione ventos, è quibus ſub lætitia ſpirant Zephyri , in ira tumultuantur Aquilones.

Si Macro-cosmus ſæcundâ proleſcit terrâ ; ſæcunditatem terræ viventium nutriti-



tricem æmulatur stomachus, membris singulis de nutrimento prospiciens: & quæ non major per cuncta & omnia in tota corporis humani fabrica Mega-cosmi repræsentatio?

Quemadmodum autem laudem & gloriam cum admiratione parit Mega-cosmo inductus ille ab Omnipotente Creatore ornatus & ordo splendidus, fertilis sæcunditas, jucunditas, florum, arborum, plantarum, motuum, fluminum, cæterorumque in eo contentorum diversitas, atque delectabilitas; ità in Micro-cosmo ordinatissima organorum series, textura, & fluidorum dispositio, actionum diversitas, & perfectio majoris ferè sunt admirationis, utilitatis, & delectationis, quando nimirum exoptata adest sanitas, ut Sol Micro-cosmicus per terram Micro-cosmicam spargens radios, exin jucunda illa excrescere faciat actionum viridaria.

Ast verò, sicut in Macro-ità in Micro-cosmo vitæ, & sanitatis Sol, eclyptici persæpè obvelatur telis, ridentesque veris opes aridam hyeme marcescunt, quin



etiam viridantia ex calore Solis ab ejus æstu contabescunt arva. Vernat teneritudine pueritia, æstuat ardore juvenus, autumnus in virorum maturitate conspicitur, in geliditate denique senectutis canescit hyems. Invadunt nebulae in mœrore, & tristitia, obscuratur cordis fulgor in animi deliquijs, ecclipsatur cerebrum in catoche & melancholia; in motibus epilepticis tonitrua, in horrore febrili, cordisve palpitatione terræ habemus motus. Pneumaticæ respirationis fabricæ in asthmate, tussi, & phthysi sufflamantur, spiritus ipsi ventorum animæ, languent in comate, lethargo, remittunt in paralyfi, aut furiantur in mania, exorbitant in delirijs, & si non alijs magisque turbinatis persæpè ventorum cohortibus exagitamur.

*Mille modis lethi miseros mors una fatigat.*

Hunc pallida exsiccant tabes, illum hydropica suffocat inundatio, alter fulminanti subitò corruit astrorum ictu, aqua & igne infertur devastatio terræ Micro-



ero-cosmicæ, paratur excidium homini;  
torpentibus hic ad motum spiritibus hu-  
mores in stagnationes, & putredinem  
vertuntur, & si quem tamen aquarum  
collectio perimere non poterat, accensô  
rogô, succensâ flammâ plagæ Micro-co-  
smicæ depopulantur, exuruntur, inflam-  
mantur partes solidæ, ubi fluidæ in motu  
progressivo præpeditæ, bellô, & motu  
intestino incalescunt, fiunt incendia Mi-  
cro-cosmica in æstus febriles, etiam tan-  
tos exardescencia, ut extingui nec arte  
Medica persæpè possint, atque de ejus-  
modi incendijs Micro-cosmicis, de in-  
flammationibus inquam tam in genere,  
quàm in specie hodie Thesium mearum  
inauguralium esto argumentum. Fa-  
xit DEUS ut in hoc æstu dulce mihi acci-  
dat refrigerium, patientibus verò citrà  
vitalis caloris extinctionem, inflam-  
mationum ejusmodi felix ex-  
stingui.





# THESIS I.

Ethymologiam , & quid-  
ditatem inflammationis in gene-  
re exponit.

**S**I ille , qui rem aliquam suscipit tra-  
ctandam à nominibus , juxtà præ-  
ceptum *Scalig. exercit. 359. sect. de*  
*subtil. adversùs Cardan.* auspicari debet ;  
quippe nomina , seu vocabula , teste Phi-  
losopho , signa sunt conceptuum , conce-  
ptus verò rerum , proin ut rei ratio faciliùs  
elucescat , statim in limine nostrarum  
Thesium nomen , & appellationem in-  
flammationis tantisper inquirere juvabit.

Vocatur autem aliàs inflammatio  
nomine Græcò *Phlegmone* , cujus deri-  
vatio non ineptè deduci videtur à verbo  
*φλεγμύνω* , quod idem est ac *tumeo* , aut  
*inflammor* , estque inflammatio , ut infrà  
audiemus , *tumor præternaturalis* , aut à  
ver-



verbo φλέγω, quod *urere* significat, inde Phlegmone quasi ustio illata, pars namque Phlegmone affecta, quasi usta videtur, hoc est, circum circa rubea, color autem rubeus igni appropriatus est, unde latinâ voce congruè inflammatio appellatur, nam præter colorem flammeum ardor est, urens calor, ac quasi ignis, aut flamma loco affecto inhærere à patiente advertitur. Fortè etiam abin vocatur inflammatio, quòd flammæ adinstar nonnunquam per vicina loca affectus hic serpat, nam quandoque inflammatio manûs aut pedis digitò, tota manus, aut pes inflammatur. Germanis aliàs vocatur *eis ne Rothe Bluethige Geschwulst*, non enim omnis tumor sub nomine inflammationis venit, sed tantùm tumor rubens, id est, calore, & ardore rubescens, &c. nominatur *Eine Entzündung*. Et hæc de nominis Ethymologia.

Cùm verò omni quæstioni, unde denominetur, etiam subjungamus, quid in se genuinè, & propriè res illa sit, damus affectûs nostri definitionem, aut (in quo

Medici non adeò stricti sumus, dummodo rem ipsam fatiſ intelligamus ) descriptionem ſequentem. *Inflammatio eſt tumor præternaturalis urens cum rubore, & dolore, ac renitentia, à ſubſiſtente ſanguinis circulo, hinc ſanguine in parte quadam, coacervato, & ſtagnante orta.*

Dicitur, quòd ſit *Tumor*, unde facile patet, quòd ad morbos auctæ magnitudinis ſpectet, à collectione enim humorum ſtagnantium neceſſariò elevatur præternaturaliter peripheria partis affectæ, illiusque magnitudo augetur, plus minùs tamen pro vaſorum magnitudine, partis aptitudine, & materiæ collectæ copia, ac obſtructionis vehementia. Non videtur tamen purus morbus organicus, ſed etiam intemperiei, ſiquidem, ſi non à priori ſemper, tamen à poſteriori humores ſtagnantes vitium qualitatis habent, aut acquirunt.

Dixi etiam, quòd ſit tumor præternaturalis *urens*, cum *rubore & dolore*, ac *renitentia*, quorum cauſas dabimus infrà Theſ. 4. Alij verò ſuperaddunt dolorem



rem esse semper pulsantem, cùm tamen quoque esse possit, & soleat tendens, pungens, gravans, pro partis affectæ conditione, & quamvis ut plurimum tumores tales fieri soleant ex obstructione arteriarum, ut ità dein dolor ordinariò ferè sit pulsans, cùm tamen arteriolæ capillares tantùm sæpissimè obstruantur, quin etiam extrà vasa sanguifera intrà ipsam carnis substantiam circulans sanguis stagnare soleat, & inflammationem facere possit, videtur pulsivus ille dolor non semper ad sensum adesse posse.

Dixi demùm *exortus à sanguine stagnante*, non quidem sanguine illo rubro Veterum strictè sic dicto, quem dari per se negamus, sed à massa sanguinea, & mixtura humorum circulantium, quæ sanè mixtura adesse debet, non enim posset pars inflammari, rubescere, &c. si non diversi inter se fermentabiles & corruptibiles humores adessent, nam & testante experientia humores ex uno solo liquore magis homo-geneo v. g. limpha aut sero, inflammationem conjunctam habere non solent.

Quæ-

Quæres tamen:

Primò: An nævi materni rubri ad inflammationem reduci possint? R. Negativè.

Secundò: An Phlogosis, & Phlegmone differant? R. Affirm:

Tertiò: An sphacelus vulgò *der Kalte Brandt* possit appellari inflammatio? R. Negativè.

## THESIS II.

Subjectum in genere, & specie proponit.

**C**onstat corpus humanum secundum Hypocratem ex contentis, continentibus, & impetum facientibus, hoc est, ex spiritibus, partibus solidis, & fluidis. Controvertitur autem inter scholasticos, num partes fluidæ (idem est de impetum facientibus) dici, aut nominari possint strictum morborum subjectum, ratio dubitandi videtur versari



fari in eo, cùm nimirùm morbus dicatur consistere in-aut cum læsione actionum, sequi videtur, quòd, dum fluida actionem strictè dictam non habent, nec morbos habere, consequenter strictum morborum subjectum esse non posse, sunt ergò potius substratum, seu fundamentum, in quo & causa, ex qua, & in qua, morbi radicantur, morbus autem formaliter, & strictè loquendo in solidis tantùm collocari posse videtur, solida quippe unica, & vera sunt organa pro actionibus, & operationibus vitalibus exercendis.

Patet ergò in inflammationibus substratum, & radicem, seu constitutivum materiale tumoris esse humores eongregatos, & stagnantes, calorem, ardorem, & ruborem efficientes, subjectum verò recipiens sunt partes solidæ, sed quæ illæ? Plures sanè admodùm; nunc enim inflatur, & inflammatur pes, nunc manus, nec tantùm partes externæ, nisi quòd ad artem Chyrurgicam spectare videntur, subjectum sunt inflammationis, sed, etiam internæ, modò enim inflam-

ma-

matur & purpureâ imbuatur tincturâ pulmonum machina, modò exardescit ventriculi amphora, nunc tremendo uritur æstu hepatis moles, nunc nephritico vexatur ardore, & tumore renum structura, modò plevra suos conqueritur acutos dolores, & calores, meninges ipsæ, duraque ac pia mater exemptæ non sunt adustionis, & inflammationis, & si ullæ, solæ fortè partes ossæ sunt, quæ accensionis, & inflammationis expertes dici possunt, & manere solent.

Præ cæteris tamen partes carneæ, & quidem tam Parenchymaticæ, quàm, quæ sunt carnis propriè dictæ, hoc malo potissimùm affligi consuevère, præsertim musculosæ, dein glandulosæ, & membranosæ, carneæ quidem, cum pluribus dotatae sint arterijs, & vasis, & copiosò semper turgeant sanguine, qui facilè in ijs remoras diutiores trahendo ex causis vel in-vel externis, compressionibus, pororum cutis obstructionibus, &c. facilè condensatur, & stagnationi adaptatur.

Clan-



Glandulosæ verò: cùm illæ segregationibus humorum dicatæ sint , ut quandoque impuritates allatæ , colatoria sua pertransire non valentia, hìc subsistere cogantur, viámque venientibus liquoribus novis præpediant, ut ità coacervatio, stagnatio, & inflammatio exin subsequatur.

Membranosæ quidem partes sat frigidæ, ad aspectum, & vix non, ùt apparent, exsanguis, suis tamen constantes vasis sanguiferis, illisque aliquando sat copiosis, ùt mesenterium, & intestina, quapropter in eorum inflammationibus, tensionibus, aut contractionibus viæ illæ sanguiferæ adeò quandoque coarctantur, ut cursui naturali humorum remora præternaturalis injiciatur, tanta etiam, ut in coagulum secedendo humores stagnent, vias infarciant, obstruant, & inflammationi sedem præbeant.

De locis verò inflammationum in specie subjicienda nonnulla forent , sed commodiùs id pertractabitur Thesi sequenti,

quenti, ubi de differentiis inflammationum sermo erit. Interea sit hic

Quæstio Prima: An in venis, vel arterijs frequentius fiat stagnatio, & inflammatio? R. In arterijs.

Secunda: An cerebrum, utpotè frigidum, inflammari possit? R. Affirmativè.

Tertia: An subjectum Pleuritidis sit Pleura, vel potiùs sanguis stagnans intra Pleuram, & costas? R. Pleura.

## THESIS III.

Differentias Inflammationum enumerat.

**Q**uantùm ex Thesi præcedenti liquere potest circa differentias inflammationum, aliæ earum dici poterunt ex-aliæ internæ, aliæ partium carnosarum, glandulosarum aliæ, aliæ membranarum, cùm verò quoad

ca-



cætera tanta adhuc superfit inflammatio-  
num farrago, ut, si non perscrutanti con-  
fusio, longus tamen labor superesse, &  
paginæ multæ adimpleri posse, quin de-  
beri, videatur. Quapropter nos & or-  
dinis, & brevitatis ergò eas ultrà in tres  
dividimus classes, & illas quidem vel cau-  
sæ, vel loci aut partis, vel modi.

Modorum discrepationem desumi-  
mus à more, quo invadunt, & accidentijs,  
vel enim *recens* est, & *incipiens*, & vera est  
inflammatio, vel *confirmata*, aut ad sup-  
purationem jam vergens, & vocatur *abs-  
cessus*, qui si factus, & majoris aliquammodo  
est collectionis, propriè *apostema* voca-  
tur, quod definimus, non esse quid aliud;  
*quam collectionem materiae purulentæ in par-  
tis alienius cavitate exortam ex dissipatis,  
& evanescentibus partibus spirituosius sta-  
gnantis, & congesti sanguinis: Reliquis ve-  
rò spissescens, grumescens, acorem  
contrahentibus, ac cum reliquis particulis  
salinis-volatilibus-oleosis in sanguine effe-  
vescentibus, usque dum ab acido non nihil  
predominante sal & sulfur precipitetur ac*  
in

*in pus album abeant.* Alia ergò est levis, & parva, & facilis curationis, ubi dolor, rubor, & tumor levis, alia *gravior*, symptomata illa vehementiora habens, nec tam facilis resolutionis, ut altera, & fortè ad suppurationem vergens, & hæc iterum vel *periculosa*, vel *non periculosa*, ubi pars non adeò nobilis, nec malum suppuratum ex sui natura tam mali moris, ut est v.g. in Cancro, Herpete, &c.

De differentia verò ratione *partis affecta* loquendo: alia est in parte ex-alia in interna, alia in regione suprema, media, vel infima, alia in pedibus, alia in manibus, seu brachijs, alia in parte nobili, ignobili vel præstante, alia est in capite, illaque vel ex-vel ad intra & frequentiori occurſu, ſi ad extra, ſub ſpecie Eryſipelatis cujuſdam, ad intra verò meninges perſæpè inflammantur in febribus, doloribus capitis, ex humorum copia, vel illuc ſub calore, æſtu febrili, copioſiùs raptis, vel cum dolore prævio inibi ſtabulantibus, uſitatum harum inflammatorum nomen eſt Phrenitis. Item Paraphre-



phrenitis, qui ex inflammatione diaphragmatis oriri dicitur, & per consensum nervi phrenici, patientes, ut in Phrenitide, delirare facit.

Inflammanur etiam persæpè tunica, præsertim albuginea oculi, & constituit morbum dictum Ophthalmiam. Inflamantur & nasus, & genæ, & aures, & labia: præsertim verò partes faciei occupare solent pustulæ, & maculæ variæ, furunculi, Epiniæctides, &c. Parotides retrò aures persæpè etiam, & maximè in morbis malignis inflammanur. Morbi aliàs tales inflammationum sunt, phigetlon, Pannus, Phima, in ore, achores, in faucibus verò quàm frequentissimè inflammanur tonsillæ, uvula, & partes faucium aliæ, tot nobis species anginarum constituentia. Frequens aliàs itèm inflammationum morbus est Plevritis, de qua supra. Huic concomitans aliquando est Peripneumonia, si membrana pulmones involvens simul inflammatur, morbusque est acutissimus, ingensque pa-

tientibus colli, & faucium æstus, sitisque  
inextinguibilis.

Inflammatur & ventriculus, & Hepar, & renes, vesica, intestina, mesenterium, ut insinuatum Thesi præcedenti : de pedibus, & manibus plura non dicam, cum ijs enim tota corporis peripheria aliquando ferè inflammatur. Talis inflammatio fit v. g. in *variolis*, *morbillis*, *petechijs*, *scabie*, aliisque morbis cutaneis, *macularibus*, quorum, ut aliorum, quid juvaret species omnes recensere, *carbunculorum* tamen & *bubonum* tam malignorum, quàm benignorum non obliviscendo.

Ad inflammationes ergò pergo, quæ à causarum discrepatione specificantur, & hæ tamen tot iterùm ac tantæ sunt, quot infrà numero causas assignaturi sumus, quapropter vel paucissimis hæc attigisse hic sufficiet :

Dividunt autem præ cæteris Authores sic : quòd alia sit inflammatio à sanguine magis puro ; & hanc legitimam appellant, quæ verò à sanguine, & bile, aliò-



liove humore mixto ortum trahit, illegitima dicitur, & , vel appellatur inflammatio, Erysipelatodes, si magis à bile, vel Oëdematodes, si de pituita multum, &c. participat.

Restat tamen præ cæteris omnibus adhuc differentia inflammationis, quæ maximæ, & gravissimæ meritò nobis est considerationis, scilicet *inflammatio cum, & sine febre, & febris cum inflammatione conjuncta*, ipsâ inflammatione peiorem morbum constituit, qui sat periculosus esse solet, ut est Plevritis, Peripnevmonia, Phrenitis, Paraphrenitis, &c. de quibus infra pluribus.

Quæstio Prima: An non in omni inflammatione febris adsit, cum semper adsit calor? R. Negativè.

Secunda: An calor semper sit Symptoma? R. Negativè.

Tertia: An inflammatio colli, semper sit Angina? R. Negativè.

Quarta: An detur inflammatio symptomatica? R. Negativè.

Quinta: An Meliceris, Steatoma,  
B<sub>2</sub> &c.

&c. hnjus generis tumores , bene numerentur inter inflammationes, vel abscessus? R. Negativè.

## THESIS IV.

Causas inflammationum internas , immediatas , & mediatas inquirat.

**I**nterest magis scire , non quid morbum faciat , sed quid tollat. Argutiorum in Medicinam Theoricam Criticorum est sententia. Verùm quandoquidem effectus semper tantùm propriè tollitur per sublationem causæ , planum mihi esse videtur, quod sanè feliciùs , & faciliùs morbum tollet , qui certiùs ejus cognoverit causam ; & nescio ferè, an adhuc morbum sustulisse dicendus sit, qui sinè causæ cognitione patientem curandum suscepit ; tantùm enim ( ùt benè ait *Benedict. Viët. Favent: in Practica sua magna*) quisque curat , quantùm cognoscit , cætera non



non ars, sed casus, & fortuna præstant, & propriè Empyria dici posset.

Nos autem hodie agnoscentes abundè, quid utilitatis ex cognitione causarum morbi in Medicum, & patientem redundet, operæ omninò prætium iudicamus, ut paulò altiùs in causas inflammationis inquiramus.

Sunt autem variæ Authorum variorum sententiæ circa causas inflammationum. *Gallenus*, copiosiore, quàm pars postulat, sanguinis influxum inculpat. *Willisus*, accusat coagulationes. *Sylvius*, sanguinem acrem, & viscidum, itè extravasatum. *Helmontius*, spinam infixam, aut rem omnem molestant, per quam Archæus in furias adigitur. *Cartesius*, succum nutritium impurum, cum particulis gladiolatis, globulis æthereis transitum denegantibus, alij alia habent, ità ut meritò censendus sit hic *felix*, qui poterit veram cognoscere causam: & fortè omnium sententijs quid veri inest, ut patebit ex infra dicendis.

Nos verò, ut methodicè hìc aga-

mus, totam causam inflammationis sic  
 damus : *Omnis inflammatio oritur ex*  
*stagnatione sanguinis, humorumve cir-*  
*culantium*, quatenus scilicet humores illi  
 stagnantes, moras diutius trahentes, plus  
 minus adhuc coagulantur, imò corrup-  
 puntur, unde vasorum cavitates adim-  
 plendo, cæteris novis humoribus, conti-  
 nuis pulsibus allatis, remoram injiciunt,  
 ut unà stagnare cogantur, atque sic aucta  
 semper per continuam advectionem  
 quantitate humorum in tumorem deni-  
 que & inflammationem facescat. Sed  
 fortè inquires, si ergò stagnatio sanguinis  
 aut humorum circulantium causa imme-  
 diata inflammationum dici potest ; quæ  
 erit causa stagnationis ? Causa stagnatio-  
 nis est obstructio, aut affluxus humorum  
 major, & refluxus minor. Sed quæ ite-  
 rum causa obstructionis, aut affluxûs il-  
 lius majoris, & refluxûs minoris ? expla-  
 nabimus id, ut spero, per duas, trêsvæ a-  
 nimadversiones.

Notum autem est, omnem obstru-  
 ctionem duplicem habere posse causam :

una,



una, & prima est, quæ ortum, & radicem habet in humoribus, quando illi circulationi inepti, per loca consueta transire non possunt, sic sanguis præternaturaliter crassus, acidus, effoetus, impurus, terrestris, &c. angustos carnis, & arteriolarum poros pertransire non valens, inibi subsistere quandoque cogitur & stagnare.

Altera obstructionis causa invenitur in solidis, quando legitimè conformatæ non sunt, prout ad circulationem liberam requiritur, & tale vitium in solidis, & impedimentum multiplex est, passim enim, & sat bene assignantur morbi sequentes in scholis Medicorum, *morbi malæ conformationis, in via dicti*; nimirum primò: Morbus malæ conformationis in via est *obstructio* propriè dicta, quando humor, vel res alia crassior in cavitate hæret, aut *constipatio*, quando corpus durum cavitatem implet, & humorum circulo remoram parit, aut *compressio*, quando extrinsecus res dura, aut premens incumbit, itèm *coalitus, & subsidentia*, quan-

do latera partis cavæ collabuntur, & uniuntur, demùm *contractio*, aut *constrictio*, quando latera ad se invicem approximantur, quod fit ab acidis, austeris, adstringentibus, vel siccantibus, aut, quod in supplementum addo, quando partium fibrillæ ob acrimoniam humorum, aliumve dolorem contractæ, vias angustiores faciunt.

Tunc scilicet, & in enarratis casibus omnibus accidit, ut humores, qui circulari, & moveri continuò deberent in cursu suo retardentur, quin planè subsistere debeant, unde, ut suprà insinuavimus, denegatò sic humoribus liberò transitu, & durante tamen continuâ illâ novorum humorum appulsione, & advectione, ex coacervatione in momenta semper majore & majore, ubi parcior, & minor eorum est revectorio, tandem pars illa affecta ex infarctu majore repletur, fortiùs distenditur, & in tumorem elevatur.

Demùm hic superaddendum, inflammationem etiam sic fieri posse, quando nimirum à quacunque causa sanguis

extra-



extravasatur, ut ità extra vias stagnare, corrumpi, cæterisque adhuc humoribus impedimento ad circulandum, & ità causa inflammationis esse debeat.

Sed & fortè videtur adhuc restare modus unus, quò inflammationes, aut obstructions, & stagnationes oriri possunt, estque talis. Humores sub æstu, agitatione, aut motu majore, seu fermentatione necessariò magis attenuantur, & per consequens rarefiunt, unde etiam citiùs, & velociùs per corpus decurrunt, circulantur, copiosius partes irruunt, largiùs arterias, & vasa distendunt; nunc, quod neminem anatomicorum latet, cùm arteriæ ex largo semper vergant in acutum, venæ verò ex acuto, & angustiori in largius, sub majori humorum rarefactione; dilatabiles arteriæ majorem quantitatem in se recipiunt, & vis fortior pulsûs, humores illos majori violentiâ ultrò premit, tunc verò, distensis & infarctis adeò arterijs, nescio, an venæ totum illud reabsorbere possint, & maximè, si causa p. n. externa, v. g. infrigidatio, vel

simile quid accedat, imò cùm de ordinario, & per se, ùt *Willisus* docet, post omnem resolutionem ferè semper accidat, aut saltèm facilis fiat coagulatio, nescio, an non facillimè in extremitatibus vasorum stagnatio fieri possit, præsertim adhuc, ubi humores à priori fuerant visci, pituitosi, qui quidem sub ipso æstu resoluti, & attenuati fuère, sed de novo facilè rursus coagulantur, unde obstructio, inflammatio. Videtur tamen modus hic fiendarum inflammationum suò modò reduci posse, vel ad vitium humorum ex quanto, aut etiam partium solidarum, si tamen & tertium statuere lubet, dicemus id vitium esse in modo affluxus humorum majoris, nimirum, quam venæ revehere possint.

Et hæc de causa interna inflammationum sufficiant, brevibus tamen hic etiam perquirere liceat causas symptomatum inflammationem concomitantium, & constituentium.

In omni autem inflammatione primò adest *tumor*, cujus causa est affluxus humo-



humorum major, quàm sit refluxus, unde, cum humores in parte affecta congregentur, & subsistant, pars ea necessariò attolli, & in tumorem elevari debet.

Secundò adest *tensio*, & *dolor*, auctâ quippe, ut dixi, humorum in motu retardatorum quantitate pars inflatur, & infarcitur, unde fibræ illius tenduntur, quam tensionem, & imminentem solutionem continui, hoc est, fibrarum dilacerationem cognoscens anima, necessariò dolorem concipit, ex lege unionis, qua corpori in ejus vitam, & conservationem juncta est.

Dolor autem ille nunc magis est pungitivus, lancinans, terebrans, acutus, tensivus, aut etiam gravativus, prout etiam pars affecta, vel magis sensibilis, nervea, carnea, membranosave est, & prout humores magis acidi, acres, aut corrodescentes, crassive sunt. Solet etiam de communi dolor adesse *pulsatorius*, in inflammatione saltèm majori, si enim nec ramus arteriæ major in se obstruitur, ex consensu tamen viarum, imò

ex vicinitate compressionis simul afficitur, & advertitur tunc dolor pulsatorius, illeque tantò fortior, quantò validiùs natura ad partis affectæ, & obstructæ refecutionem spiritus dimittit, motumque, pulsumque humorum adauget. Itèm prout pars inflammata majoribus, vel minoribus; aut paucioribus arterijs est prædita, non tamen semper adeò advertibilis.

Causa ruboris, qui adesse solet, varijs statuitur varia. *Hyeron. Fabric. lib: 7. de Tumorib. p. II. pag. m. 572.* dicit, quòd sit calor; alij inculpant sanguinem, qui transparendo per tenuem cuticulam oculos adstantium rubore suo perstringit, & persuadet; *Cartesius* verò, ut omnem colorem in diversa pororum corporis dispositione, & configuratione consistere dicit, ità ruborem in inflammationibus ex tali reflexione, & luminis percussione deduxit, & tametsi dicatur, quòd rubedo hæc oriatur à sanguine, ipse sanguinis rubor ex simili reflexione globulorum, & ætheris, seu luminis consistere videtur, splen-



splendidior tamen hic rubor tantò magis est , quantò vehementiùs pars ipsa inflammata, hoc est : in calore , & ardore constituta est, ob motum partium vehementiorem, celerioremq̃ue particularum & reflexi luminis motum , & variationem.

Causa *renitentia*, circa quam quis facilè obijcere posset , sanguinem esse humidum, & mollem, adeòque non posse causare renitentiam, ad quod autem resolvendum dico , verum quidem esse, sanguinem esse mollem , cùm verò ibi magis impellatur, & stagnet nonne etiam particulæ sibi magis uniuntur , intricantur , & coeunt , unde cum vasorum distensione renitentia major , dum verò jam aliquæ particulæ rursùm dissolvi, & separari incipiunt , & major reliquis in suppuratione iterùm patet locus, renitentia illa magna, & tumor cessant: pro exemplo, liceat sumere aquam vulgarem, quæ mollis est, huic, si vesicam quandam exsiccatam imposueris , & maceraveris,

duo

duo habebis mollia, sed reple vesicam illâ aquâ, itâ, ut nullum intercludatur vacuum, nonne manifestam digitis percipies renitentiam, modicô verò aquæ effusô, ut remanenti locus pro mutatione remaneat, non tantam ampliùs reperiēs renitentiam.

Supereſt, ut adhuc dicamus, quomodo ex inflammatione fiat Absceſſus, ſeu quomodo pus illud generetur, ſi inflammatio confirmata ſuppuretur? Et reſpondemus, illud paucis quidem, ſed ſat claris dictum eſt ſuprà Theſi 3. ubi de differentijs inflammationis, & ubi Absceſſus, & apoſtematis definitionem dedimus.

Sed & alterum adhuc eſt, unde febres illæ, quæ aliquando, & ut plurimùm inflammationes majores concomitantur, an à pure illo, in quod abeunt inflammationes diuturniores, ſic enim inſinuare videtur illud *Hypocrat: ſect. 2. aphor. 47. Dum pus fit, febres fiunt.*

Verùm non à pure illo febres fieri ex hoc conſtat, cùm febre tantùm fiant, ubi  
pus



pus fit, non pure factô, ergò non à pure, sed cum pure, quando scilicet illud fit, etiam febres fiunt, *pure autem factô*, ut idem *Hypocrates* habet: *Febris, & calor remittunt*, ergò non à pure, nec ex ejus commixtione cum humoribus febres fiunt, sed causa quærenda est alibi. Sit ergò hîc

Quæstio Prima: An generatio puris sit purum opus naturæ bene operantis, ut, quando nimirum illa noxium illud, & materiam stagnantem resolvere, & discutere non amplius potest, institutô tali febrili motu naturæ criticô illud in aliud quid eliminationi, & excretioni magis proportionatum concoquat? R. Affirmativè.

Secunda: An ergò febris omnis dici possit talis motus naturæ criticus? R. Affirmativè.

Tertia: An omnis inflammatio suppurari debeat, & si non, quorsum materia, & humores stagnantes perveniant? R. Ad primum, Negat: Ad secundum dissipantur.

# THESIS V.

## Causas dispositivas, & procatharticas enumerat.

**I**Nter numerum causarum procatharticarum nobis veniunt omnia, quæcunque vel ad obstructionem, vel compressionem viarum, humorum incrassationem, &c. concurrere, juvare, aut disponere possunt, ut sunt, ex rebus p. n. contusio, fractura, disructio, luxationes, vulnera, &c. cum quibus vel extravasatio, vel fluxio, vel dolor fiunt, & ex iisdem facilis, vel viarum obstructio, constrictio, compressio, vel humorum incrassatio, stagnatio, & inflammatio.

Aliàs verò ad morbum hunc dispositi valdè sunt, qui temperamenti sunt humidioris, complexionis sanguineæ, aut qui acidô p. n. abundant, & quorum sanguis particulis multis heterogeneis scatet. Inter res naturales quoque formes summus ad hunc affectum delitescit,

&





pedinem in spiritibus , viscositatem in humoribus, motus verò nimius spirituum debilitatem infert, & circulationis tarditatem, humorumque incrassationem.

Si etiam , quæ naturaliter excerni deberent, retineantur , aut quæ retineri debeant, excernantur, facilis fit inflammatio, in priori enim casu, excrementa massæ sanguineæ p. n. commixta , & retenta, effoetam illam reddunt, impuram, atque ex tantis fœcibus saltèm in extremitatibus viarum, glandulisque separatorijs, aut colatorijs obstructio.

Inter passiones animi, præsertim tristitia hunc affectum fovet, absumitur enim in mœrore humidum spirituosum, crassumque heterogeneous congregatur, impediuntur enim, & in mœstitia secretionες naturales, in sanguine permanent, cum alijs particulis nunquam satis resolutis, nunquam satis exaltatis, elaboratis.

Aliàs etiam è rebus non naturalibus, seu non necessarijs plures sunt, quæ affectui nostro viam sternunt, nè autem prolixus

lixus nimis sim, sufficit declarâsse, quòd omnia, quæcunque ad impuritatem sanguinis facere, earum secretionem impedire, vel quocunque modò concurrere possunt, causæ dispositivæ, & externæ hujus affectûs dici, & haberi possint. Interea, pro majori hujus Theseos dilucidatione, sit

Quæstio Prima : An ira possit esse causa inflammationis ? R. Affirmativè.

Secunda : An medicamenta calida stagnationem inducere possint ? R. Affirmativè.

Tertia : An inflammatio partis ex contagio haberi possit ? R. Affirmat.

Quarta : An angina possit esse morbus contagiosus, vel epidemicus ? R. Affirmativè.

## THESIS VI.

### De Diagnosi discurrit.

**I**gnoti nulla cupido, ergò, & frustra est curare morbum, qui non per signa

cognoscitur, jamque notum effulget Medicorum axioma, adeoque, nè nos hac in parte degeneres videamur, non absre judicavimus signa quoque annectere, quæ morbi præsentis notitiam cuique manifestent, cum verò quis facile objicere posset, non opus esse hìc multa velle blatrare de signis, cum aliunde ubi dolor, ibi morbus, & cuivis manifestum sit: omne, quod præternaturaliter rubet, tumet, pulsatur, & dolet, phlegmonis, seu inflammationis intitulandum esse nomine, quia tamen in generaliori differentiarum prolatione eas, nempe inflammationes, in internas, & externas dividere nobis arridebat, non immeritò quivis; quamvis aliàs oculorum, & linguæ acutie præditus, nobis assensum condonabit, hac quoque in re, tum genericam, tum specificam inferre diagnosim, cum facile quivis externam intuens rubedinem p. n. dicere, queat: adest inflammatio. Non absolum tamen veritati est, hoc quoque in casu multos à veritate deviare, tam, quia sæpè sæpius phlogostica rubedo eam mentiri, quam



quàm internarum partium occultare constitutio valet , adeoque lubet adhuc imprimis genericam afferre , præsertim externarum partium phlegmonum, differentiam, deinde particularem etiam occultarum, seu internarum. Sit itaque generica (juxta jam factam in definitione , & causis) diagnosi , ubi cuique se manifestat inopinatus isthic hospes , cum calore excellenti, dolore intolerabili, rubore intenso, febre præternaturali, renitentiâ accusabili , & pulsatione morbidâ, quæ omnia simul sumpta, & ritè perpen-  
sa sat dilucidè inflammationem assignant.

Diagnosìs autem inflammationum internarum multò difficilior est , in ijs tamen , quodcunque lumen haberi potest ex dolore , & actionum læsione , & alijs symptomatibus , actiones autem læsæ, sicut in animales, vitales, & naturales dis-  
pertuntur, sic quoque animales capiti , vitales pectori, naturales abdomini attribuuntur. Atqui sic asserimus , omnis generis inflammationes ad triplex hoc

divisionis genus deduci posse, & quidem primò, in suprema regione haud rarò per furorem, delirium, imò & rabiem patescit stasis phrenetica, seu meningum, cerebrique inflammatio, per periculosissimam febrem, dolorem intensissimum, faciei, & maximè oculorum ruborem confirmatur, ac per stuporem, soporem, & mortem nonnunquam absolvitur, secundò, mediam regionem obsideri demonstrat pro partis diversitate actionum læsio: designatur angina obscura, ob deglutendi, respirandi, summum conatum, febrem continuam acutam, & dolorem ad faucium radices magis perceptibili, & linguæ tumorem. Ità pulmones, difficilis respiratio, febris intensa, dolor in superioribus, maximè ad claviculas, & fauces ad linguam, in qua, si siccitas, asperitas, adustio, & sitis inextinguibilis adsit, signum peripneumoniæ est. Pleuram pungitivus lateris dolor, cum febre acutissima, difficili, & dolorosâ inspiratione, sputum non rarò cruentum, aut aliud, & tussis molesta, ac summè dolorosa con-

comitatur. Diaphragma singultus, febris, & dolor ad spurias, seu infimas costas demonstrat. Tertiò tandem inflammationem in infima regione commonstrant, v. g. in ventriculo, dolor ingens ad sinistram sub costis spurijs regionem, se se quandoque ad fauces usque extendens, vomitus frequens, ac continuus assumptorum, febris cum animi deliquio, cardialgia, agripnia, &c. Et inflammatur rariùs lien, ad hypochondrium sinistrum suum extendens dolorem, &c. hepar ad dextrum cum bilificatione læsa, ità, ut facile ei superveniens oriatur icterus. Intestina media abdominis continet, & proponit regio. Mesenterium obtusum adeò, & occultum prodit tumorem, doloremque, & non nisi febris ferocitas, corporis atrophica contabescencia sæpè cum funestissimo declarat progressu. Renes, vesicæque suum declarant hostem per ardorem, calorem, dolorem urentem, mictum aliquando cruentum, ast non nisi jam ad auctò malò, ab initio verò rarò, & vix non cum nephritico dolore, ad lum-



bos tendente, urinâ flammeâ, & sæpè sanguine commixtâ, cum urgente dolore ureterum ductum, & vesica patefit. De cæteris partium internarum læsionibus plura allegare supersedemus, videri potest eorum diagnosi sub proprijs capitibus, hoc unicum hoc locô adhuc moneamus: calor internorum, & frigus externorum, inflammationem internam assignat. Calor, & dolor internus subitò remittens inflammationem in gangrœnam abiisse, commonstrant, sed spectant hæc fortè magis ad prognosim. Quare sit

Quæstio Prima : An inflammationes internæ ex urina rubicunda dignosci possint? R. Negativè.

Secunda : An febris cum inflammatione designet suppurationem? R. Negativè.

## THESIS VII.

Quæ per prognosim futurum declarat statum.

**P**Rædictio, & prænotio subsecuturi, aut boni, aut mali morbi eventus, non modò *Medici caput exaltat, ut in conspectu magnorum collocetur. Ecclesiast: 38. v. 3. & 4.* sed & ei magnum in medendi methodo suppeditat auxilium, iste enim doctis, vulgo, & plebi prudens audit Medicus, qui certis edoctus signis afflicti interitum (& per hoc ab omni immunis erroris inculpatione) vel saltèm & patientis ergà se adauget fiduciam, imò ista eum haud rarò ab omni eo distinguit, qui se artis Medicæ adscriptum fatetur, minimam verò, aut nullam hausit ea in arte eruditionis guttulam. Illa quoque non levis est prognoseos utilitas, quòd Medicus providus præordinare valeat, & sciat, quò tempore patienti medicina exhiberi, ac remedium applicari debeat. Tertiò itèm, cùm omninò verum sit illud Poetæ: *Sepè tibi doctâ, plus valet arte malum*, & Medici scientia nonnunquam à morbi superetur violentia, *est tamen prudentis hominis, primùm eum, qui servari non potest, non attingere,*

*nè videatur occidisse, quem sors ipsa interemit. Deinde, ubi gravis metus est, sinè certamen desperatione, indicare necessarijs, periclitantis in difficili rem esse, nè si victa ars malò fuerit, vel ignorâsse, vel fefellisse videatur, sed ut hac prudenti viro conveniunt, sic rursùs bistrionis est parvam rem attollere, quò plus præstitisse videatur. Cels: L. 5. c. 26, pag. 283.*

Pro commutatione proinde fraudis in laudem, immeriti in meritum, cupressi in palmam, veri induentes officium Medici, verò, & sincerò nos induentes Prognosticò, tripartitam nobis proponimus conditionem inflammationum, & quidem primam ex morbi magnitudine, symptomatibus, & accidentibus; secundam, ex causis eam producentibus; tertiam, ex constitutione subjecti, & partis affectæ.

Sit igitur primæ satisfaciendi conditioni primus locus à subjecto, & parte affecta, illud verò primò primùm universaliter bonum, aut malum, sicuti omnibus reliquis in morbis, sic & huic inflamma-



torix affectioni salutem pollicetur, aut lachrymabile canit epicedium. Testante Germano Hypocrate lib. 5. c. 26. pag. 285. *Facilior sanescit puer, vel adolescens, quàm senior, valens, quàm infirmus, neque nimis tenuis, neque nimis plenus, quàm si alterum ex his, integri habitus, quàm corrupti, exercitatus, quàm iners, sobrius, & temperans, quàm veneri, vinoque deditus.* Abundant enim vires naturæ in juvene, quæ in sene, aliunde fluxionibus obnoxio, absunt, infirmus, ob malam humorum crassim, sæpè recidivas facit, nimis tennes, proni efficiuntur pro, levi datâ ansâ, vasorum solutione, athletarum boni habitus ad morbos periculosos proni existunt, referente Coo, imò omnia similia subjecta, quæ non adæquatâ gaudent symetria, magis, periculosiusque decumbere, Theſes de causis longè, latèque deducunt, puerperarum, sicuti omnes morbi, sic & phlegmonæ periculosiores, *Waldsch. in casib. Medic. fol. mibi 358. & 359.* subjecta cacochymica, plethorica non excludimus. Cùm verò totum sinè partibus non sit,

fit, particulares nonnunquam obveniunt inflammationes, quarum tamen eæ, quæ communioris, aut nobilioris officij, tenerioris, ac sensibilibioris structuræ, largioris, ac intricatioris vasculorum texturæ viscera occupant, aliàs inflammatio partium carnosarum non adeò periculosa est, ut membranosarum, cum facilius solvatur, & suppuretur felicius, si verò viscera interna inflammentur, pro partis nobilitate periculum majus adest. *Sic à morbo laterali inflammatio pulmonis, malum. Hypoc. sect. 7. aphor. 11. A pulmonis inflammatione pbrenytis malum. Aphor. 12. Ubi in feбри non intermittente difficultas spirandi, & delirium acciderit, lethale. Sect. 4. Aphor. 50. Signum namque est, magnam in pectoris partibus, præsertim diaphragmatis, inflammationem exortam fuisse. Aphor. 17, sect. 7. In hepatis inflammatione, singultus malum. Quod & de alijs viscerum inflammationibus cum singultu frequentissimè docet experientia, quod indicium est auctæ, vicinisque partibus valde sensibilibus communica-*

tæ phlegmonæ. Et hæc dicta de consensu. Si verò ipsam partem considerare arridet, certissimum est, partes superiores, & interiores, nimirum cerebrum cum suis consodalibus, ob animales facilè læsas actiones, esse periculossimi eventus, mox enim ratio sufflaminatur, delirium subsequitur, &c. In pectore periculosa internæ inflammationes, ob vitales operationes: haud rarò namque minantur suffocationem, uti in angina patescit, in qua aëri liber ad pulmones denegatur transitus, stasis communicatur pleuræ, pulmōni, mediastino, & sic facilè cor quoque tangit, & angit. Summum aliàs imminet periculum, si internarum partium æstus est, externarum verò frigus, ut emphaticè exprimit Divus noster senex his verbis: *In morbis acutis frigus partium externarum malum. Sect. 4. Aphor. 48.*

Infimam tandem petens regionem, naturales plùs minùs violat actiones, in ventriculo cardialgiā, vomitum, anorexiā, & quod intolerabile, dolorem immanissimum, & ob viciniam diaphrag-

ma-



matris, singultum, spirandi difficultatem parit. In mesenterio, utero, vesica, renibus, liene, hepate, terribilia, & atrocissima infert symptomata, ex ijs pericula, ex periculis desperationem, ex desperatione mortem. Si tamen tumores interiores dereliquentes partes ad exteriores serpant, bonum est, cum semper melius sit metastasim fieri à parte nobiliore ad ignobiliorem, nisi illa quoque ad nobiliorem accedat.

A morbi magnitudine tale est prognosticon : omnes leves, parvæ, superficiales, in partibus externis, ignobilibus, faciliores, non periculosæ, insensibiliter, discussibiles habentur, ob cuique manifestam rationem, tum, quòd causa sit levis, quæ forti à natura facilè solvitur, ac superatur, tum, quòd obstructio tanta non est, non magna sit actionum læsio, & quod optimum proximè adstant emunctoria universalialia, nempe pori cutanei, è contrario magnæ, pertinaces, conjunctæ cum alio morbo, magno dolore, feбри, non rarò non vacant periculò. De tali-

talibus etiam loquitur *Hypocrates*, quando dicit: *Repletiones ad extremum progressæ difficiles sunt. 1. Aphor. 3.* Itèm, *Galen. lib. 5. c. 4.* Nihil est, quod profluvium magis, quàm dolor prurit, & pblegmones auget. Inter alia, inflammatio interna, quò majorem dolorem, febrem junctam habet, & pars affecta est nobilior, eò plùs periculi protendit.

Sic etiam pro magnitudine causæ, si levis, & ex levi causa; facilè resolvitur, quò verò causa major, malignior, eò periculosius malum, sic, si causa sit impura, cõmixta, aut cacochymica, in plures exitiosos degenerat morbos, ut sanguis ferrosus, ichorosus, &c. in ulcera, furunculos, & abscessus: viscidus, terrestris; in scyrrhos; acidus, & causticus in ulcera ferpentia, caneros abit: interna semper periculosior, quàm externa. etiam tumor, & inflammatio meliùs est ab intrà ad extrà, quàm ab extra ad intrà ferri.

Aliàs, quò majora adsunt symptomata, eò periculosiorem inflammationem arguunt, convulsiones in inflamma-

tionibus malæ, febres, & deliria mala, ubi somnus verò deliria sedat bonum. *Hypocr. 2. Aphor. 2.*

Plura verò, quæ specialiter circa prognoses inflammationum specialium dari, & dici hîc possent, proprijs sub capitibus, qui fusioribus, & specialioribus volet, apud Authores practicos quærat, & inveniet.

Pro conclusione annectimus modum, quò omnes terminare se solent inflammationes: vel enim insensibiliter dissolvuntur, & discutiuntur (si leves) à naturæ viribus; vel, si tenaciores, particulæque activiores in actum deductæ sint, lucta, actio, & reactio, & tandem quid tertium, seu pus producit. Quòd fiat manifesta illa pugna, docet Medicorum *Abavus Hypocr. sect. 2. Aphor. 47. Circa puris generationes, dolores, & febres magis accidunt, quàm ipsò factò; cùm autem febris fiat, & habeat calorem, calor dependeat à motu, necesse est, fieri ibi motum præternaturalem, per quem pus laudabile, & coctum præcipitatur. Dum verò ante*



te tempus, vel ab ipso naturæ conatu, vel imoderato repellentium, discutientium, & resolventium usu particulæ subtiliores avulsæ, crassiores verò relictæ sunt, in scyrrhosam abit substantiam, si verò refrigerantibus, & sopientibus importunè cura continuata fuerit, ut calor natus suffocetur, humores cum parte corrumpentur, emunctoria præcludantur, quò factò, ingravescente membranarum partium tensione, fibrarumque stricture, sanguis à libero ad periphæriam cursu, ac recurso præpeditus, ac repressus plùs semper intrò colligitur, donec naturâ sensim languescente, fortius subsistere, copiosius colligi, ac in absolutam, & per vicinas partes serpentem stagnationem fatiscere incipiat, ex quo altiori inflammationis gradu facilè gangræna oritur, estque sphaceli præcursor, & instantis mortis, nisi enserecidatur, nè pars sincera trahatur. Sed de tali inflammationum cura, pluribus infrà. Sit igitur

Quæstio Prima : An Hypocratis  
Aphor: *Acutorum morborum non sunt cer-*

D

te

*ta prædictiones, neque ad salutem, neque ad mortem, in omni inflammatione locum habeat? R. Negativè.*

Secunda: An Medicus patientem desperatum, præmissô Prognosticô, derelinquere possit? R. Negativè.

## THESIS VIII.

Indicat, quid in cura universaliter faciendum.

**O**Mnis medendi methodus fit per indicationes, inquit *Galenus lib. ii. cap. 7.* adeò, ut vix quispiam citò, tutè, & jucundè suam nanciscatur curam, qui non generaliore sibi per indicationes conciliaverit Idæam, cur? cui? & quale applicare intendat remedium? sic nos, non deviantes à comuni norma, & Galeni præcepto, nostræ quoque curæ quæpiam præmittere volumus universalialia, indicationes scilicet: non immemores, cur? cui? & quale appli-

plicandum sit remedium? cùm non omnis inflammatio eadem expetat, neque omnis eadem ferat remedia partis constitutio. Sic & *Galenus* dicit: Posse quidem de inflammatione in genere dici, ut ità illius describatur curatio, sed talis tamen, quæ insufficiens sit futura, si ad particulares inflammationes v. g. jecoris, oculorum, &c. fuerit deventum. Unde semper parti affectæ appropriata adicienda sunt, quod & vulgaris edocet medendi methodus. Itaque haud difficili nobis exprimenda venit negotiò universalis indicatio, & quidem cum *Galeno* asserimus *L. 1. ad Glauc. cap. 11. Opportet in inflammationibus principia curationis optima fieri, nam quæ in ipsis errata contingunt, difficulter sanabiles, aut omninò insanabiles faciunt dispositiones. Nam & hìc competit illud Poëtæ:*

*Opprime, dum nova sunt, subiti mala  
semina morbi,*

*Nam mora dat vires.*

Nè verò transgrediar *Celsi* monitum  
in præfat: *Lib. 1. pag. 10. relictum: morbi non*



*eloquentiâ, sed remedijs curantur.* Ad rem propero, & primam statuo indicationem cum Galeno Lib. 4. cap. 4. *In omnibus, in quibus affectûs causa adhuc manet, ab hac inchoanda curatio est.* Pro qua indicatione, omnia tollenda impedimenta, nè hinc inde limites inscribere valeant curæ, humorum abundantiam imminuere sit animus, cum præsertim illi præternaturaliter excedentes, causæ formam induant. Discrasia attemperanda, viscida attenuanda, acria corrigenda, fibrarum strictura lenienda, obstructions resolvendæ, pori aperiendi, quò natura vergit, per molimina excretoria, eò adjuvanda, incitanda, & confortanda venit, ubi Medicus agat ministrum, necesse est.

Cum autem sanguinis stagnationem pro primaria assignaverimus causa, prima quoque ut curetur expedit: sicut verò & inflammationes sua quatuor observant tempora, principium namque, dum recens, & levis est; augmentum, dum magis affligit, ac increfcit; statum, ubi omnia symptomata in summo vigo-

re,

re ; & declinationem , in qua morbi solutio , in quibusdam salutaris , in quibusdam verò unionis vitalis disruptio , & via ad Patres paratur , sic quoque , ut acutus morbus , citissimè sua absolvit tempora , nisi in principio materia affluens repellatur ( si partis conditio , & situs admittat , ac non ad nobiliorem repellatur partem ) revelatur ad loca distantissima , & ignobilia , derivetur ad opposita , intercipiatur per defensiva , dum verò , vel neglecta , vel ob morbi malitiam abacta non sit in principio causa affluens ; stagnans , & affluxus resolvetur , & discutiatur sanguis . Si neque his cedere velit , ultimum arripiatur remedium per conversionem in pus , abscessus maturus , si ad extra , aperiatur , mundetur , atque iterum læsa consolidetur . Si interna , opus naturæ relinquendum , & tantum lenientibus , emollientibus , detergentibus , consolidantibus , succurrendum . Accidit tamen his sub curationibus persæpè , ut immediatæ causæ occurrere non valeamus , sed urgentiori symptomati succurrere cogamur , ut bene *Ga-*

*lenus ait lib. 12. cap. 7. Si causam ipsam, unde dolor excitatur, adimere possis, ita utique contra symptomata nō pugnaveris, sed aegritudinem curaveris, si qua occasione prohibitus affectui submovendo intentum esse non licet, vehementiam doloris mitigabis.* His ergo & prioribus indicationibus, ut satisfieri possit per convenientia, propero ad sequentia, interim tamen hic sit

Quæstio Prima : An absque indicationibus quis curare possit ? Negativè.

Secunda : An unum medicamentum duabus intentionibus satisfacere possit ? R. Affirmativè.

## THESIS IX.

Pharmaceuticum, per remedia interna, suppeditat auxilium.

**U**niversalis indicatio causæ ablationem flagitat, causam obstructionem, & stagnationem esse diximus : stagnatio, & obstructio resolvable



tibus , & aperientibus referatur, quibus autem in specie remedijs, mox afferemus: Sunt autem talia remedia , quæ intrinsecus assumpta causam debellant. Quemadmodum verò etiam devicto hosti viam sternere decet, adeoque accedent non minùs remedia externa; unde in duas dividere Theses quoque animus est, in hac intrinseca, in sequenti extrinseca assignantes medicamenta.

Inter intrinseca sunt, quæ sanguinem stagnantem resolvunt, circulationi restitunt, vel discutiunt, aut si ad causas medias respicere lubet , quæ acrimoniam absorbendo , crassitiem sale volatili temperato resolvendo, heterogeneum præcipitando operantur. Sunt autem talia vulgò dicta blandiora diaphoretica, quæ in principio, curæ punctum ferunt , testante *Waldschm.* parantur ex antimon: diaph: lap. ocul. cancr. corn. cerv. mandibul. luc. pisc. dent: apr. sang. hirc: unior. fos. Bezoar , &c. His si annumeremus nitrata, efficacissima parari valent antydota, diversis formulis comprehenden-

da, admixtis nonnunquam specificis pro parte affecta : sic capiti convenit specif. cephal. Michaël. pulv. panonic. rub. spec. de hyacinth. prostant quoque pro hac intentione in pharmacopolijs diversissima composita, ut pulv. antiplev. AA. imò copiosissima ab Authoribus hunc in finem afferuntur remedia diaphoretica.

Si tamen jam copiosior, impactiorque contigerit affluxio, & stagnatio, ijs adjici solet, sal volat. CC. Viperar. urin. camphor. tinctur. Bezoart. mixtur. simpl. antihect. Poter. quæ activiori pollent resolvendi virtute; ast tamen Medici adsit judicium, necesse est, nè indiscriminatim volatilia adhibeat, sed benè consideret statum morbi. Si adsit febris major, & dolor fortior, illa medicamentis calidis magis adaugentur, minùs enim conducunt in magna turgescencia, orgasmo, & spirituum petulanti motu, ubi eorum compescentiæ humorum, si non refrigerationi, saltèm moderationi, intermixtis etiam acidiusculis, & frigidiusculis studere oportet, dein etiam, ideò abstinendum

dum à calidioribus, nè dissipatis volatilibus particulis crassior hæreat pars, & in scyrrhum tendat,cautus sit eorum usus, nè dissipari subtiliores, & incrassari terrestriores juvemus.

Quòd si etiam contingat malignitatis quid subesse, adjicienda erunt alexipharmaca, uti sunt: spec. de gemm frig: confect. alkerm, compl. & incompl. pulv. Bezoart. Sennert. Bezoar: or: camph: &c. quæ pro individui, & sexûs diversitate in dosi, & electione modificanda, ita ut non detur hystericae affectioni obnoxia; confect. alkerm. complet. cùm moschum, ambramque ferre non possit.

Sic pro symptomatum quoque præcautione, atque extirpatione multifaria addere lubet, in spasmodicis contractionibus recommendantur cinabarina, ungu. alc. præp. succin. alb. præp. cran. human. non humat. præp.

Ex his, & similibus proportionatâ dosi (ut superius jam insinuatum) jubemus parari pulveres, bolos, & mixturas, de prioribus elapsô singulô sex aut octo



horarum spatiô , vel ad minimûm manè ,  
 ac vesperî unum porrigimus , cui patiens  
 sub quieto , si possibile sit , decubitu , leni-  
 ter insudet , de posterioribus , cum aquis  
 appropriatis , ût flor: sambuc: scabios:  
 cheræfol: card: mar: & benedic: scorzon:  
 Bard: syrup. scab. &c. paratis singulo bi-  
 horio aliquot cochlearia probâ agitatione  
 propinamus , uti est illa excellens , & ma-  
 gnæ virtutis Ettmilleri ℞. aqu. hyssop. fæ-  
 nic. à unc: dua. acet. dist. drach. dua.  
 Spirit. Theriac. drach: Sem. ocul. cancr:  
 drach. un. sperm. cet. mumi. à Scrup. un,  
 laudan. opi. gr. quat. syrup. de 5. radic.  
 unc. un.

Interponimus ad demulcendam  
 humorum acrimoniam , & æstum tem-  
 perandum , fibrasque in quietem rela-  
 xandas , nocturno tempore emulsionem ,  
 ex semin. card: benedic: mari: citr: scor-  
 zon. papav. alb: 4. frig. maj. cum aquis  
 prædictis , alijsque diluentibus , ût endiv:  
 papav: errat: Anagalid: aquat: acac: Tus-  
 silag: lactuc. , prunell: additis absorben-  
 tibus , nitratis , julep: rosar: violar: syrup.  
 de

de alth. Fernel: aut alijs, pro rei exigentia.

Continuamus his & similibus per prima principij, & augementi tempora, sperantes has fore naturæ supetias, expectantes salutarem inde solutionem, quò minùs verò facilè adeò in conatibus natura deficiat, sub statu cardiacis, et analepticiis eam instauramus; talia sunt, portiones ex margar: præpar: corall: rub: præpar: CC. philos: præpar: off: de cord. cerv: spec: de gemm: frig: aq: 4. cordial: ceras nigr: CC. citr. cordial. frig. Hercul. Sax. cum confect. Alkerm. syrup. acetos. citr. violar. simpl. papav. rhead. man. Christi. perl. constantes, nitrosisque acidulatæ, ut & æstui febrili levamen feramus.

Si hìc opiatìs utendum, ob narcoticam, & incrassantem vim per se non arri- dent, nisi diaphoreticis, cardiacis, & alijs commixta sint, & tamen, ut suprà innui, adhuc cautè.

Quærenti, cur hìc omittam purgantia, cùm tamen in causis cacochymiam accusaverim, quæ non nisi purgantibus tolli-

tollitur? Respondeo, verum quidem esse, me aliquando etiam concedere caco-  
chymiam pro causa inflammationis, ast  
tamen non video rationem sufficientem,  
ubique sinè discrimine caco-  
chymiam pe-  
tere, & indicare purgationem, præsertim,  
ubi contraindicans obstat, imò majores  
in tali statu excitarem turbas, ob stagna-  
tionem, humores funderem, fluxionem  
adaugerem, consequenter morbum nu-  
trirem, neque ullus Authorum hoc sua-  
dere videtur, cùm non liceat uni succur-  
rere, & alterum adaugere. Recordetur  
quæso, adversarius, me etiam assignasse  
copiosum fluxum ad partem affectam,  
nonné talis adaugeretur per tam violentum  
motum in massa sanguinea excita-  
tum, *Waldschmidius* nec gargarismum,  
(qui tamen pro pororum refectione pro-  
desse videtur) in angina, in morbi princi-  
pio approbat, cùm per talem motum ma-  
jor fiat irritatio. Observo, & teneo sen-  
tentiam *Hypocratis Germani, Celsi* dicentis:  
*A parte inflammata quò plus purgaveris,*  
*plus addes.* Non tamen rejicio, quin ap-  
pro-



probo, referatâ stagnatione, aliquod lenitivum, ubi nullus amplius restat metus, per decursum verò morbi æque enemata approbamus.

In inflammationibus specificis internis v. g. in pleuritide, ubi pus confectum est, etiam ad anacatharsim disponi debet per lenientia: ut est oleum amygd. d. cum sachar. cand. ol. lin. destit. &c. & expectorantia per idem ol. amygd. syrup. violar. papav. errat. capill. vener. de jujub. de liquir. mucil. sem. psil: aq. appropriata extract: vel decoct: hord. passul. jujub. sebest. fic. herb. scabios. capill. vener. cheræfol. hæder. Terrestr. flor. Belid. papav. violar. &c. ubi tamen semper universalia præmittenda, ut venæsectio, clyster lenitivus. Plura verò circa cibum, & potum dicemus infrâ Thesi ultima de Diæta.

Quæstio Prima: An dentur medicamenta strictè sumendo specifica?

R. Negativè.

Secunda: An Galenus imitandus dicens: *quæ in alto sunt corpore, cum proprijs pbleg-*

*phlegmonis remedijs aliquid acrium Medicamentorum requirunt. R. Affirmat:*

Tertia: An ros Majalis conducat, & æquivaleat spirituosis medicamentis?

R. Affirmativè.

## THESIS X.

**Materiam Medicam ex fonte Chyrurgico cum medicamentis externis extollit.**

**S**Emel pro semper, atque ubique, antequam ordinantur remedia, recolligendum habet Medicus, quòd respectum habere oporteat, & causæ, an maligna, an benigna. Ætatis; an juvenis, puer, vel senex. & sexûs, an vir, an foemina. Excretionum, an consuetæ, & hæ iterùm an retentæ, an non, vel inconsuetæ. Constitutionis, an nobilis, an plebejus, an rusticus. Regionis, an calida, an frigida. Morbi temporis, an initium, an augmentum, an status, an declinatio. Ejus essentia, an acutus (sæpiùs)

(sæpiùs) an non (& rariùs) Constitutionis patientis, an timidus, an audax, an meticulosus, an deliquijs subjectus. Ultimò tandem virium, an robustus, an debilis, an valetudinarius, Athleta. Quibus annectimus an sit plethoricus, an cacochymicus.

His ità prælibatis, quæ & Thesi priorì applicari volumus, ex fonte chyrurgico depromentes remedia, eadem observari volumus, & quidem præ omnibus circa usum venæsectionis, quæ etiam præ medicamentis pharmaceuticis, si locum habet, celebrari debet, illa enim, ut *Galenus* habet, seu, ut verbis proprijs utar: *sic & vasorum evacuatio, si quidem qualem fieri decet, fiat, confert, & facile ferunt.* Accedit expertissimus *Waldschmidius*, inquit: *Venæsectio in quavis inflammatione est administranda.*

Ast audio obmurmurantem infensissimum venæsectionis osorem *Helmontium*, dicentem: Sanguinem extravasa non amplius in ea reduci valere per hoc remedium, & sic frustra esse, & crude-



delem ejus administrationem. Huic tamen, omni ejus sublimis scientiæ adhibito respectu, repono, eum in malo versari supposito, nos hîc velle extravasatum reducere sanguinem, ast potius, ob nimiam affluxionem, seu motum progressivum, stagnationem, vel ex copia, vel ex vitio crassitie, aut motûs nimij, seu fermentativi, *levatâ namque, quæ corpus nostrum regit, naturâ, exoneratôque eò, quò velut sarcinâ premitur, haud agrè, quod reliquum est, vincet. Galen. lib. 2. de morb. curat.* non enim aliud intendimus, quàm speramus per venarum aperturas imminutâ in vasis exterioribus quantitate, relaxatâ in interiorum, superiorum, aut viciniorum partium vasis, sanguinis compage, non tam portionem ejus à parte stasi obsessâ subtrahere, quàm & nimiam eò pressuram moderari, ac congestionis augmentum maturè antevertere, ut sic natura parte oneris levatâ faciliùs motu suo propulsoriô ac divulsoriô discussionem possit consequi.

Quibus accedit, nos non velle sequi  
Vete-

Veterum illorum methodum, & mittere sanguinem usque ad animi deliquium, aut coloris mutationem, cùm citiùs vitæ defectum, quam bonum effectum expectare cogeremur.

Nec etiam hanc instituimus a pertionem, nisi in morbi principio, ut ità motum illum excessivum, & fluxionem retardemus, atque sistamus, & præsertim adhibitis circumspectionibus, quas in Theseos initio proposuimus, in principio enim disposita est materia pro evacuatione, quæ in statu incrassescit, in initio adfunt vires, in statu deficiunt; ex eadem ratione non convenit in malignitate conjuncta, ubi spiritus per se ligati, atque hebetati: nec tam facilè celebranda est in prægnantibus. Sequimur præceptum *Hypocrat. lib. 5. aphor. 30.* dicentis: *Mulier in utero gerenti, si vena secetur, abortit, & magis NB. si fatus sit grandior.* Neque pueris usque ad annum quartum & decimū, imò neque senibus, præsertim viribus debilibus existentibus, nisi summa exigat necessitas, ut vult *Aëtius 3. tetraab. sect. 3.*

Ultimò tandem non unâ, sed repetitis mittere vicibus expedit, tum, nè vires depauperentur, tum, ut leviori ferat commodò ipse æger, nam *omne nimium natura inimicum.*

Ubi verò, quaque in parte illa instituenda sit, multi grandes instituerunt disputationes, & lites, ratione scilicet derivationis, & revulsionis, quippe dixerant, si sanguinẽ fluentẽ à nobiliori ad ignobiliorem derivare partẽ est animus, illa fiat in parte distantissima, sic in inflammationibus partium capitis, illam in pedibus administrabant, putantes, per hoc massam illam, aliàs ad caput tendentem, illuc fluere, dum verò sanguinem jam-jam collectum, & fluxum revellere volebant, eandem in opposita parte celebrabant, ut ità ille, non opus habens longioris circulò, sanguis citiùs ad contrariam ablegetur, aut viciniorem partem.

Nos verò industriâ aureâ Harvæi circulum sanguinis edocti, quòad universalem evacuationem multùm ab eis recedimus rationibus, cùm non potior  
pro



pro hac, quàm illa parte militet ratio, imò incertum est, omnem sanguinem quasi ex eodem fonte oriri, in eundemque rursus transportari, ità, ut levata in una parte natura, & spatium pro resolutione aspiciens, non negligens eam tentabit: Si verò ad particularem attendamus venæsectionem, lubentes venerandæ antiquitatis capeffimus fundamenta, cùm experientia comprobet, v. g. in angina benè prodesse raninarum incisionem, in uterî phlegmone popliteæ, & nî hæ sufficient, etiam aliarum in alijs locis.

Cùm in prænotationibus superiùs in hac Thesi etiam mentionem fecerimus de sexu, ætate, viribus, & timidis, aliud Medicîna excogitâsse pro illis videtur remedium, quod non rarò ipsi venæsectioni pro re nata substituere conamur, sunt autem infecta illa in stagnis reperibilia hyrudines dicta, quæ in sexu sequiori delicato, & timido, quandoque substituantur venæsectioni, & sic alicui evacuationi satisfacimus, dum nimirum plures affiguntur locis venosis, illisque animal-

culis in cauda læsis sanguis flui finitur ad sufficientem quantitatem: non tamen in evacuatione consueta cathamæniorum retenta pro omni sufficiunt semper scopô, sed lanceram, seu phlebothomum eligere cogimur. In infantibus, ob tenellam venarum constitutionem venæsectionem non sufferentibus ejus vices agere hyrudines, experientia Perillustris, ac Honorandissimi Professoris nostri Primarij nos docuit. Vires eis non adeò absumi authopsia condocet, nam non tantô impetu, sed lentè, & quasi insensibiliter sanguinem educere solent.

Succedunt cucurbitulæ cum scarificatione, quæ æquè è minoribus vasculorum ramulis evacuationem quandam præstant, haud inutilem. Affiguntur frequentissimè scapulis, brachijs, cruribus, &c. applicamus eas nonnunquam ad partem læsam, dum morbi causam ictus venenati cujusdam animalis suppeditavit.

Et ista sunt arma illa diversa, enses, hastæ, spicula, & tela, quibus ferocem hunc

hunc incensorem à Troja nostra ornatissima abigere conamur.

Nec tamen hæc omnia sunt, quæ ab extra præstari poterunt, verùm remedia alia ordinari possunt, & in loco, ubi vel externè, vel sub quo internè inflammatio latitare creditur, applicari valent.

Talia ab initio sunt resolventia, aperientia, discutientia, atque defensiva. in augmento temperantia, & conservantia naturalem partis temperiem. In statu iterùm resolventia, & aperientia, si his non cedat, etiam suppurantia, maturantia, & tandem mundificantia, pro diversitate causæ, symptomatum, & loci affecti. præparantur diversa in forma, ut empl: cataplasmi: foment. fot: colyr: gargarism: &c.

Quæcunque tamen hîc afferimus, pro majori parte inserviunt pro externis, suô tamen modô contra internas etiam accommodanda erunt.

Laudantur ab initio valdè, ubi fluxio incipit, & tumor levis adest: primò oxicraturum, quod non, ut fortè vulgus cre-



dit, constringendo, aut eam impedit, aut adauget, sed volatilibus particulis cutis intrando poros, eos reſerat, & obſtrucciones reſolvit, deinde excellit camphora, tam in ſubſtantia, quàm diverſa in forma præparata, aut admixta, uti eſt, ſpirit. vin. camphor: croc. tartariſat: cùm alcalicis ſuis volatilibusque qualitatibus abſorbendo, reſerandoque ſummè laudetur: ſuccedit ſal armoniacum, uti eſt ejus ſpiritus cum vini ſpiritu commixtus, prodeſt & ſpiritus matricalis, aq: calc: viv: multaue alia alcalia, & volatilia. Dolæus ſequentem ſuam mixturam valde laudat, quæ conſtat ex aq. calc. viv. unc. iij. ſpirit. vin. camphor. crocat. matric. à unc. j. ſal Saturn. drach: j. in vitro uſui aſſervatam, ſæpiùs cum linteis duplicatis applicandam. Sunt & alia terrea, alcalia, & abſorbentia, maxime ſpicula acida obtundentia, & abſorbentia, uti eſt lythargir. bol: armen. terr. ſigill. maſtich. borax. gumm. ammoniac. thus, &c. ex quibus diverſæ formari valent formulæ pro Medici prudentia, & patientis utilitate,

tate, modò humida sub forma, modò  
 sicca, tepidè tamen semper applicanda,  
 cùm frigida inimicissima, testante *Wald-*  
*schmidio*, imò haud rarò fiant gangrænæ  
 productiva. Sic non minùs repellentia,  
 adstringentia, stiptica, & similia, pruden-  
 ti rarò sint in usu Medico, nam facilè a-  
 gyrtarum

*Quos faciunt nisi non aliena pericula  
 cautos.*

methodum sequens, poros obstru-  
 ens, materiam incrassans, calorem nati-  
 vum suffocans, gangrænam, ex hac  
 sphacelum, & tandem mortem accelera-  
 bit.

Augmentum intendens malum, po-  
 tentioribus, præmissis universalibus, re-  
 solventibus, & aperientibus, proceden-  
 dum, non tamen importunis, nè postea  
 dissipatis subtilioribus partibus crassa, &  
 scyrrhosa remanet compages. Parantur  
 ex herbis sale volatili balsamico abun-  
 dantibus, uti est: herb. malv. violar. ros-  
 marin. rhut. ment. meliss. verbas. scord.  
 veronic. chærefol. flor. sambuc. melilot.

chamomill. radic. althæ, &c. sem. cumin.  
 carv. fænicul. ex quibus parata prostant a-  
 pud Dolæum tinctur. phlegmonica, aut  
 cathaplasma ejus ex herb. rhut. scord. ab-  
 synth. à Mß. pulv. rad. brion. unc. ß. dra-  
 chm. ij. flor. chamomill. sambuc. à Mß.  
 farin. lupin. unc. j. Bacc. laur. drach. x. coq.  
 ad consist. pultis mollis, adjecto spirit. sal.  
 armoniac. cum calc. viv. parat. drach. ij.  
 bis vel ter de die applicat. vel Ettmill. suū  
 extollit fomentum, quod parat ex ly-  
 tharg. lib. ß. flor. rosar. rub. M. ij. myrrh:  
 Thur. mastich. à unc. ß. aq. cale. viv. re-  
 cent. lib. iiij. acet. destill. lib. iß. coq. do-  
 nec lytharg. solut. circa finem addit  
 camphor. unc. ß. colat. & tepidè cum lin-  
 teis applicat. Perillustis, ac Spectabilis  
 Dominus Professor noster honorandissi-  
 mus suffumigium suum commendat ex  
 nucib. avel. cum cortic. virid. unc. ß. cort.  
 extern. betul. drach. iiij. Flor. sambuc, sa-  
 bin. à drach. ij. flor. croc. camphor. à  
 drach. ß. adject. si lubet, pro placido, ori-  
 gan. In excessivo calore nonnunquam  
 anodina admiscere lubet ex malv. althæ.



mucilag. earum vel semin. psil. &c. quæ tamen mucilagines obstruendo, & obliniendo poros à multis improbantur, si verò & calorem temperare est animus, adjicimus aperientibus succum semper-vivi, portulac. lactuc. solan. umbilic. vener. qui succi non propriè refrigerando, ut quipiam putant, sed efferum motum sopiendo, levamini sunt, adhibitâ omni cautione, nè actu frigida, sed tepida applicentur, nè per frigus actuale pori constringantur, malumque in deterius abeat. Acida, & unctuosa summè fugienda volumus, tum, quia facilè calorem nativum suffocant, corrodunt, gangrænæque viam sternunt. Improbamus non minùs emplastrorum applicationem, nam poros occludunt, liberamque retinent transpirationem, nisi sint simul diaphoretica, sæpiusque renovata, uti est emplast. diaph. sulph. Ruland. diaphoret. Minsicht. de sperm. ranar. &c. quæ tamen non tenaciter adhæreant parti, sed sæpiùs resoluta, & inhærens humiditas abstergetur, & locus temperatus sit, necesse est.

Statum attingens phlegmone minime repellentibus insistendum, ast potius opera danda, ut ea, quæ impediri nequiverat fluxio, pro possibili sensim deriveatur, & aperiatur, si verò pro partis ratione suppurationem intendet, eadem adjuvanda, & nullò modò natura in suo opere impedienda, quæ peragitur ijs, quæ poros occludendo intestinum adaugent motum (ut febris, & dolor quoque increascit, patat ex *Hypoc.*) agendo, reagendoque tandem pus coctum præcipitare conantur, uti est emplast. Diachil. de melilot. cum ol. lilior. albor. malaxat. Palmam verò præripiunt cathaplasma. quæ vel emplastris superponuntur, vel per se applicantur, ex malv: viola. menth. rad. aristoloch: rotund. femin. lin. foen. Græc. vitel. ovor. &c. quæ vel in aqua simplici, aut lacte decoquuntur. unde laudatur lac, in quo sapo incoct. vel illud Dolæi ex herb. althæ M. ij. Menth. M $\beta$ . Flor: chamomill: melilot: à M. j. coq. in lact. dulc. lib. iij. in fine adde mic. pan. alb: farin. sem: lin: à unc: iij. ol. diapalm: unc:

unc. j. vitel. ovor. n: iij. croc: parùm: M.F.  
 cathaplas: vel illud Sorbayth: R. herb:  
 malv: mic: pan: à lib. j. coq. in lact: capr.  
 f. q: & cum ol. rofar: F. cathaplas: vel ex  
 mel: unc. β. ferment. drach. ij. ocul. cancr.  
 sal: volat: succin. & pingued: lepor: unc. iij.  
 paratum. Sunt & centena alia tam mul-  
 tis Authoribus, quàm Chyrurgis, imò  
 plebi notissima, ut hic plura afferre su-  
 persedere consultum sit.

Confectum sic pus quandoque se  
 ipsum manifestat ex cessatione febris, &  
 doloris, testante *Hypocrate*, cutis elevatur  
 quasi in mucronem, levis sentitur, & tre-  
 mula pulsatio, pars albescit, mollescit,  
 & prementi facilè cedit, sin minùs, vel  
 ob partis profunditatem, vel loci crassi-  
 tiem contingit, ubi tamen Chyrurgus,  
 aut Medicus prudens facilè sibi formabit  
 Idæam. Tunc verò quantociùs opera-  
 danda, ut illud evacuetur, vel à natura,  
 vel arte, nè contentum ultra tempus, fi-  
 bras dilaceret, profundas agat radices,  
 sinus, fistulasque inducat. contingit non  
 rarò, ut ipsa natura conatus suos demon-  
 stret



stret per cutis dilacerationem, purisque  
exclusionem, si verò moras traheret, pus-  
que optimè confectum appareret, in su-  
perficie situm, lancetâ; in profundo lati-  
tans, cultro incisoriô vulgò Incision-Mes-  
ser ei exitus paretur. Ubi tamen notan-  
dum: secti, vel usti, si pus confertim ef-  
fluat, periclitantur, ob vires unâ cum pure  
excretas, adeoque meliùs in copioso re-  
tento pure per vices evacuandum.

Abcessus apertus purificandus erit  
cum balsam. sulphur. therebint: balsam.  
peruvian. therebint: mel: rosar: farin: hord.  
&c. quæ simul pus ex extravasatis parti-  
culis conficiunt, confectum abstergunt,  
ulcusque mundificant.

Sarcosis, cùm sit naturæ opus, Me-  
dicusque tantùm minister, per Diætam  
analepticam, decoctum vulnerarium in-  
tùs sumptum, potum Thee, &c. eam ad-  
juvet. quæ autem omnia hìc dilucidare,  
non est hujus fori. Cicatrix inducenda  
nonnullis inepta videtur, cùm ipsa natu-  
ra provida mater ex correcto, & laudabili  
nutrimento per se ulcus claudere conetur.

Si

Si verò ( ut sapè ) contingat ex morfū animalis, aut infecti venenati inflammationem oriri; aut cathaplasmata paramus ex theriac: midritat: diascord: pulv: buffon. &c. aut ea præcedentibus commiscemus, ut etiam ab extrinseco vis deleteria extinguatur, figatur, & adjuvantibus alexipharmaco - diaphoreticis, intus assumptis è corpore eliminetur. Sunt, qui suadent, animalia viva, ut gallinas, columbas, &c. per medium secta, aut carnes aliorum recenter mactatorum animalium applicare, non ommissis diaphor: bezoarticis internis.

Dum gangrænam sibi subsequi velit inflammatio, occasio ei, quantum fieri potest, deneganda, per superiùs allata volatilia, partem jam quasi emorituram reviviscere facientia, si verò frustrà impediatur, ultimum tandem amplectendum remedium, & summus morbus summô remediô tollendus, nempe exstirpatio membri, cujus conditio, & situs consentit tentanda. Non tamen hic quispiam credat etiam v. g. genam, aut  
labia

labia gangrænata tolli detruncatione capitis, aut tantum intelligimus partis emortuæ minus principalis ; melius enim est patientem mancum, vel unipedem facere , quam certæ mortis relinquere, & subicere falci. Et hæc sunt, quæ brevitatis studio de generali topicorum applicatione insinuare intendebamus , non volentes rem ad nauseam prolongare , cum quivis artis nostræ amans , & alumnus copiosas sibi efformabit tam ex his , quam Authorum voluminibus formulas, ut semper associatio prudenti iudicio patienti satisfacere queat. Pro conclusione Theseos particularia quædam de internis, & principalioribus, quotidianâ oblati experientia, inflammationibus annectere placet, & quidem

In phrenitide, præter alia applicantur animalia viva dissecta ad caput , & plantas pedum.

In ophtalmia colyria præferuntur, ex aq. euphras. fœnicul. &c. rosar. spirit. vin. sachar. Saturn. camphor: tut: croc. sang. columbin. calidè instillato. Sacharo subti-



subtilissimè pulverisatô inflatô. Al-  
bum: ov. cum Alumin. conquassatum ,  
multaque alia , quæ à vetulis etiamnum  
affatim ordinantur.

In angina conducunt gargarismi, qui  
verò ab initio non bene utuntur gargari-  
fando, sed potiùs injiciendo per sypho-  
nem, vel in ore detinendo; cùm violen-  
tus ille motus majorem inducat irritatio-  
nem, & consequenter influxum, & sta-  
gnationem pertinacior, ut refert *Wald-  
schm. lib. 2. c. 1.* Parantur ex moro, cor-  
tieibus viridibus juglandum, melle, apud  
*Waldschm.* vel etiam ex flor. sambuc. me-  
lilot: chamomill. herb. alth. malv. radic:  
alth. semin. fœnic. mel. rosar. &c. Ex-  
tus cathaplasma ex nido hirundinum coc-  
to, & applicato, vel etiam paratum ex  
resolventibus, & aperientibus. Tumor  
verò etiam foras vergens, & pertinacior,  
ad suppurationem ducendus, cavendo  
verò, nè intrò tendat, cùm facilè suffo-  
cationem minetur, universalia, ut venæ-  
sectio. sudorifera in omnibus his specie-  
bus

bus nunquam negligenda, sed opera danda, ut tumor intus extrà tendat.

In pleuritide, externa, quæ in usum veniunt, sunt: applicatum cathaplasma ex olibano, superpositâ inter duplicia lintea avenâ tostâ. vel decoct. malv. violar: verbasc: flor. sambuc. melilot. chamomill. chærefol. veronic. scabios. scord: &c. in lacte factò commixta, & cum linteis, aut vesicâ bubulâ inclusum applicatur decoctum, aut sacculi sicci ex florib. chamomill: sambuc: semin. foenu-Græc. anis. &c.

In intestinorum phlegmone enemata ex prioribus, aut lacte parata, conducunt, extrinsecùs quibusdam placet omentum, & partes animalium calidè è corpore desumptas applicare.

Et hæc etiam maximè usitatæ in specie sunt inflammationes, ad quas, uti & omnes morbos devincendos Megacosmus ex omni trino regno, animali nempe, minerali, & vegetabili Microcosmo suppeditat arma, quibus tamen, cùm omnium Authorum, & præsertim Thesium

nostrarum, libri sunt pleni, ultrò superse-  
demus, atque nos convertimus ad eà,  
quæ è fonte diætetico haberi possunt, pro  
quo sit interim

Quæstio Prima: An in inflammatio-  
ne hepatis hepaticâ, in phrenitide cepha-  
lica secanda vena? R. Problematicè.

Secunda: An cucurbitulæ scarifica-  
tæ venæsectionis locum adimpleant?  
R. Negativè.

Tertia: An camphora refrigeret?  
R. Per accidens.

Quarta: An valeat Hypocratis a-  
phorismus: *Frigidò in bis utendum, unde  
fluit, aut fluxurus est sanguis?* R. Cum dis-  
tinctione Affirmativè.

## THESIS ULTIMA.

Diætam ordinatam insti-  
tuit.

**T**ertium tandem membrum, quod  
amplectitur Medicus in curan-  
dis inflammationibus, est Diæ-  
ta,



ta, seu fons diæteticus. Sicut enim in  
 causerum procatharticarum dilucidatio-  
 ne malam diætam incusavimus, sic hîc  
 eam per emendatam, & proportionatam  
 oppugnabimus, verum enim est, ejus præ-  
 posterò, ac inordinatò regimine inflam-  
 mationem augeri, propagari, sympto-  
 mata exacerbari, naturam in mollimini-  
 bus turbare, sed è contra bona illius admi-  
 nistratio iterum bonum ferre levamen,  
 solamen, auxilium, & salutem introdu-  
 cere potest.

Non tamen diætæ nomine solum  
 includimus cibum, potumque, ast & om-  
 nes sex res non naturales, quæ sunt aër,  
 cibus, & potus, motus, & quies, somnus,  
 & vigiliæ, excreta, & retenta, atque ani-  
 mi pathemata. Cùm non minùs ac ci-  
 bus etiam hæ sint homini necessaria.

Sic Primò aërem frigidum angue  
 pejus, & cane fugiendum esse docet  
*Waldschmidius*, nè poros constringere faci-  
 lè tentemus, ijs constrictis, & obstructis  
 stasim augeamus, è contra eligendus te-  
 pidus, temperatus, serenus; si non per se  
 talis

talis reperiendus, salutari in cubiculo remorâ concilietur.

Circa victum, de quantitate ciborum vix quidquâ dicendum est, cû inappetentia plerumque ea sit, ut ad sumendum etiam modicum fermè rogari velint patientes. Sit igitur de qualitate hic nobis sermo, & constet ex jussulis cappon. gallinar: carn: Ptisanâ, cremor. hord. alteratis acetos. endiv. cherafol. borag. succ. citr. & limon. vel etiam adjecta gelat. CC. Ebor. , ac calidè sapiùs sorptis, expedit, enim delectationi quidpiam derogare, & illud sanitati adjicere, *ubi morbus peracutus est, statim extremos habet labores, & extremè tenuissimò victu utendum est.* Hypocrat. sect. 1: aphor. 7. vitanda omnia acida, acria, crassa, fructus horæi, fumô, & sale condita, aromatica fortiora, caseus, &c. quæ vel chylum crassum suppeditando, aut augere obstructionem, vel exagitando majorem motum, & fluxionem conciliare valent. Potus sit decoct. ex rasur. CC. ebor. hord. radic. gramin. cozon. passul. jujub. flaved. citr. aut si

varietas delectet , potus aquæ fontanæ  
 pane triticeo , aut anisatō tostō correctæ  
 porrigatur , vel misceatur cum tinctur.  
 flor. papav. rhead. violar. farfar. borag.  
 buglos. sambuc. cerevisia tenuis , aut hor-  
 deata , aut medicata præcedentibus , in  
 delicatioribus concedi valeret , si non  
 contraindiceret febris major, & æstus, præ-  
 feruntur verò decocta. Nunquam ta-  
 men actu frigidi ingurgitandi potus. Ab-  
 stinendum tamen à vino, murmuret de-  
 super quousque velit plebs bibula, & ob-  
 trudat, vinum vires reficere, cor lætifica-  
 re, multis conduxisse ad vitam, & sani-  
 tatem, illudant illi, ut fit, Medico, sed  
 probam nē repetant, nec alij imitentur,  
 quæso, saporem enim sciunt vini, non tex-  
 turam, ac virtutem particularum, nisi  
 dū ebrij dolorosè noxam persentiscunt,  
 nam Medicorum monet Abavus Celsus lib.  
*5. cap. 26. pag. 299. vinum omnibus, dum fe-*  
*bris dum inflammatio est, alienum est.* Si-  
 cuti enim acida nocent, sic quoque vinum  
 ob acidum contentum, & intrò assump-  
 tum idem præstat.



Motus, quamvis non appetatur à stragulorum mancipio, tamen non nunquam violentè appetitur, maximè ab officijs urgentibus adscriptis, meliùs enim est, unâ alterâve septimanâ quietè lectum inhabitare, quàm accumbendo mortis cœnæ officium anhelanti cedere successori. Quies tamen omnimoda magis inviscat, & incrassat humores, adeoque pro morbi discretione levis deambulatio per vices tentanda.

Somnus communiter ignotus videtur phlegmone detentis, quod tamen non sempiternum, adeoque in assuetis pro re nata modificandus, contrariæ verò vigiliæ, cùm valde virium inferant jacturam, coërcendæ.

Excernenda tam sensibilia, quàm insensibilia eliminare conati sumus jam toto curæ nostræ tractu, adeoque crambem recoquere abhorremus, si tamen contingere accideret, ea modum excedere, pro Medici prudentia corrigenda, & moderanda forent.

Animi motus fortiores, ut ira, ter-

ror, mœstitia, excessiva lætitia, cùm vel  
exagitando, vel retardando fluxum, re-  
fluxumque maris Micro-cosmici, nocivi  
sint, coërcendi sunt, confirmante *Wald-  
schm. in monit. medic. fol. mibi 419.* adeòq;

*Calidus fatus, tepidus potus ,  
Quies, inedia, bona remedia,  
Cum patientia, erunt ingentia.*

Atque hæc sunt , quæ ad eliminan-  
dum infidum reipublicæ Micro - cosmi-  
cæ hostem adducere conati sumus , non  
volentes integros proponere discussio-  
num Tomos, sed pro modulo paucis com-  
plectierat animus ea, quæ inflammatio-  
nē tam in genere, quàm in specie explica-  
re, & ejus curas facilitare possent , cujus  
nobis hîc Jehova sit



# COROLLARIA.

Prima : Vapores ex cibis exhalantes quempiam per nares, & os fame privare possunt.

Secunda : Medicus non attingens semper suum prætentum finem culpandus non est malæ curæ.

Tertia : Non omnis morbus malus dici potest ratione finis.

Quarta : Medicus anathomiam instructus sit, summè necesse est.

Quinta : Morbi occultarum qualitatuum nulli dantur.

Sexta : Non datur spiritus naturalis in hepate genitus.

Septima : Læsiō cordis non semper per se lethalis est.



Octava : Ira non dependet ab effusione bilis in stomachum.

Nona : Urina non est certum signum speciei morbi , nec pars affecta semper ex illa dignosci valet.

**FINIS.**



Ad-

AD PRÆNOBILEM,  
AC DOCTISSIMUM DOMI-  
NUM DEFENDENTEM.

**N**on ità per ventos venit omnibus assa  
columba,  
Sed qui se studijs conatur reddere cla-  
rum,  
Sedulus ac prudens sit, id ars exposcit, oportet:  
Annuus hùic Medicus cursus non sufficit  
unus;  
Hos exhaustisti fontes FRANCISCE per annos  
Tres, Tibi quos Ordo Medicus jam tempore  
promittit.  
His evolvisi Medicos noctesque, diesque  
Libros, ast sequitur nunc Numine dante la-  
bores  
Optatus dudum finis cum laude perenni,  
Quam respondendo simul opponendo mereris  
Vesuvij diras humano in corpore flammās  
Tollis, & extinguis nunc doctâ & mente sa-  
gace,  
Examen pateris, rigidam scandendo cathe-  
dram,

Ut

*Ut reeves tandem lassatos corporis artus,  
Ac simul agrotis sanissima corpora reddis:  
Hinc meritò exhaustis applaudo laboribus ar-  
tis,*

*Et precor, ut tantos bona fama sequatur ho-  
nores:*

*His paucis volui tibi solvere debitum amoris,  
Sint rata vota: DEUS velit his benedicere ab  
alto.*

*Undique sis felix, successibus utere faustis.*

Incomptâ ergò hac musulâ, & sequen-  
ti cabalisticô hæc consecrata cupio:

*Arte tua infirmo, ac superis pietate placebis.*

Proba.	A - 1	I - 9	S - 90	p - 60	p - 60
	r - 80	n - 40	u - 200	i - 9	l - 20
	t - 100	f - 6	p - 60	e - 5	a - 1
	e - 5	i - 9	e - 5	t - 100	c - 3
	t - 100	r - 80	r - 80	a - 1	e - 5
	u - 200	m - 30	i - 9	t - 100	b - 2
	a - 10	o - 50	s - 90	e - 5	i - 9
		a - 1			s - 90
		c - 3			
	497	228	534	280	190

Summa Summarum 1719.

Georgius Fridericus Medicus, Mogo-  
nus, AA. LL. Phil. Mag. Med. Audit.



# MAXIMILIANUS

SEYFFERT.

## ANAGRAMMA.

I, Tueâre, fis }

Ità verè fis }

I, ut è re fias }

Nix flammis.

In Theſibus luſtras Microcoſmum; Heu! igni-  
bus ardet,

Pars ſagrat, & flammât, pars alia uſta  
perit.

I, TUEARE Hominem, ſi illum depaſcitur ig-  
nis

In flammis totum, ſcis, aqua & unda va-  
lent,

I, TUEARE, iſtis FIS NIX contraria FLAM-  
MIS.

VERE ITA FIS FLAMMIS NIX, aqua  
mox & eris.

I ergò, UTFIAS E RE NIX humida FLAM-  
MIS.

Si nix ſis flammis, ſis ſimul unda rogis.

I, tueâre tenet quas inflammatio partes,

Sitibi non dat aquam, fert anagramma  
nivem.

Ità accinebat in Applauſum.

ANTONIUS, JOANNES, FRANCISCUS

GEONER, AA. LL. & Philoſ. Magiſt.

Medic. Auditor.

*Syrius exsiccum vix desijt urere Mundum,  
Flammæ, atque æstum jam Microcosmus  
habet,*

*Ecce flagrant, accensa rubent, flammata cremantur*

*Ora Microcosmi! est hinc calor, inde dolor.  
An rogas hic Medicâ potis est extinguier arte?  
Fac bene, si calles, fac, quia & ipse cales.  
Ipse cales, totusque flagras charissime Frater.  
Ignem igne extinguas? non bene, at adfer  
aquam,*

*Æstus erat, magnusque labor geminaverat  
æstum*

*Hactenus, ut modò non, fac, tibi desit aqua,  
Ergò animo sis mactæ tuo, dum stella Leonis  
Mitior in signo Virginis esse solet.  
Mactæ animò, mactæ ore, ardore, calore, labore,  
Mox erit ex æstu dulce refrigerium.*

*Hæc amico carmine accinebat Fratri  
suo dilectissimo.*

*Josephus Ignatius Seyffert,  
Art. Pharm: Candid:*











